



Inatsisartut Suleriaasiannut allannguutissatut siunnersuut.

(Inatsisartut Siulittaasoqarfiat)

(Siullermeerneqarnera)

Tamat oqartussaaqataaneranut pingaaruteqarpoq uagut aaliagiisartutut malittarisassat maleruagassiallu tamatta atugassagut sianigisuaannarnissai. Tamatumuuna Inatsisartut Siulittaasoqarfiat qutsavigerusuppara Inatsisartut Suleriaasiannut allannguutissatut siunnersuuteqarsimammat.

Siunnersuut naligiissaarinerpassuarnik imaqarpoq, maannalu uteqqiisariaqanngilanga. Killormulli siunnersuutip naleqqutinngitsortai Demokraatillu isumaat malillugu aaqqiivigineqartariaqartut aallutissuakka.

Siullermik Demokraatit ajornartorsiutitut annertuutut isigaarput siunnersuummik Naalakkersuisut Inatsisartunut ilaasortat siunnersuutaannut aningaasatigut allaffissornikkullu aningaasartuutissanik naatsorsuisaleqqullugit peqquneqassammata. Demokraatit isumaqarput ajunngitsuusoq akisussaassuseqarnermillu takutitsinerusoq Inatsisartunut ilaasortatut nammineq siunnersuutigerusutatta kingunerisassai misissorlugillu saqqummiuttassagivut.

Akisussaaffeqanngitsutulluunniit isigaarput akisussaaffik tamanna Naalakkersuisunut ingerlateqqinneqassappat. Siunnersuuteqartumut peqqinnarlunilu ajunngitsuuvoq nammineq siunnersuutigisap aningaasatigut, allaffissornikkullu kingunerisassaanik nalilersuisarneq. Taamaangippammi sunaluunniit siunnersuutigineqarsinnaangussaaq. Ingasattajaalaarlunga kisiannili piviusorsiortunik assersuuteqalaarlunga.

Takorlooriassagissi Demokraatinit aningaasarsianit akileraarutit atuukkunnaartikkusukkutsigit? Tulluassuami taamatut siunnersuuteqarutta inuiaqatigiillu aningaasaataannut qanoq naleqassanersut nalilersornagit?

Tulluartuussua siunnersuuteqarutta meeqqerisunik 500-inik nakorsanillu 500-inik sulilertitsisoqassasoq aningaasatigullu allaffissornikkullu kingunissai nalilersunngiivillugit?

Isumaqarpunga isummiussaagallartutut apeqqutinnut akissutit nalunangitsuusut. Taamatut oqareerlunga Demokraatinut tupinnarpoq tamatumuuna Inatsisartut Suleriaasiat allanngortinneqartariaqarmat. Aningaasatigummi allaffissornikkullu kingunissat nalilersornissaat ajornarpiannngikkualarpoq. Piffissaajarnarsinnaavoq, kisiannili Inatsisartunut ilaasortat piffissaminik pilersaarusiortariaqarpoq



tamakkua misissornissaanut piffissaqarluarumalluni.

Tamatumuuna Demokraatit siunnersuuteqarusupput tassunga tunngasoq siunnersuummit peerneqassasoq, taamaalilluta Inatsisartuni ilaasortatut sulii akisussaaffilittut pissusilersorsinnaaniassagatta siunnersuutigisatsinnullu aningaasatigut allaffissornikkullu kingunerisassaanut tunngasunik nakatartissinnaalluta. Tassami taamaattussaangaluarpoq.

Qulaani eqqartukkangara siunnersuutip ajornartorsiutaanni annersaavoq, kisiannili allanik aamma eqqaasaqalaarusuppunga.

Demokraatit isumaqarput apeqquteqaat aallaavigalugu oqallinnissamik siunnersuutit ataatsimiinnerup ingerlanerani ingerlaavartumik nalunaarutigineqarsinnaanerit periarfissaajunnaarnissaa eqqunngitsusoq. Isumaqarpugut periarfissaq taanna ataannassasoq. Isumaqataavugulli arlaleriarluni siunnersuutit pisarialimmik saqqumilaartunut sammisaqartangimmata, tamannali aqqvigineqarsinnaasoraarput siunnersuuteqartoq Siulittaasoqarfimmut oqallissaarutip saqqumilaartunera tunngavilersorsinaasariaqassangaat. Taamaalisoaqareerpallu Siulittaasoqarfik aaliagiisinnaangortinneqassaaq oqallissaarut oqaluserissasanut ilanngunneqarnissamut piukkunnartuunersoq.

Taassuma saniatigut isumaqarpugut Nunat Avannarliit Siunnersuisoqatigiiffiannut inissat qinigaaffimmi paarlakanneqartussanngorneri kukkunerusoq. Nunat Avannarliit Siunnersuisoqatigiiffianni sulineq suunngitsunngortinneqarluni partiinut tamanut misileraaffinngortinneqassanngilaq. Isumaqarpugut suliaq pingaaruteqartuusoq, atajuartumillu nangitsisumillu suliffiusussaalluni, tamannalu peqquataalluni ilaasortat ukiut ataasiakkaarnagit qinigaaffimmili tamakkiisumik qinerneqartarnissaat tulluarnerusoraarput.

Naggataatigut maluginiarparput siunnersuut manna suleriaatsip annertuumik allanngortillugulu nutarterneqarnissaani alloriarnerni siulliinnaammat. Siulittaasoqarfiullu kalerriuppaa 2020-mi upernaakkut ataatsimiinnissami sulii allanngutissanik pilersaaruteqartoqarmat. Tamatumuuna qulakkeerusupparput Siulittaasoqarfiup Inatsisartuni aalajangiunneqarsimasooq una maluginiarsimaneraat:

”Aningaasartuutit sulluunniit Inatsisartunit taakkulu allattoqarfianit aningaasartuutigineqartut kikkunit tamanit takuneqarsinnaanngornissaat pillugu taamatullu kikkut tamarmik paasiniaasinnaanngornissaat pillugu Inatsisartut Suleriaasiata allanngortinnissaanut Inatsisartut Siulittaasoqarfiat siunnersuuteqaqqullugu peqquneqarnissaanik Inatsisartut aalajangiiffigisassaattut siunnersuut.”

Demokraatinut pingaaruteqarluinnarpoq aalajangiussap taassuma tuavioernerpaamik timitalerneqarnissaa.

Taassumallu saniatigut isumaqarpugut misissortariaqartoq piffissami sivikinnerusuni Inatsisartut ataatsimiinneranni ataatsimiittarfimmiinnani peqataasinnaaneq periarfissanngorsinnaanersoq. Isertuunneqarsinnaanngilaq ataatsimiittarnerit sivisusarmata, ilaqquttanullu illoqarfigisami maqaasisarneq



annertusinnaasarluni. Tamanna millisarneqarsinnaangaluarpoq piffisami sivikinnerusumi
angerlarsimaffigisamiik telefon-ikkut/aamma imaluunniit videolink aqutigalugu
peqataasoqartalersinnaasuuppat.

Tamanna kommuunini ajornanngilaq, taamaammallu aamma Inatsisartuni ajornartussaangikkaluarpoq.

Taamatut oqaaseqarluta siunnersuut Inatsisartut Siulittaasoqarfiannut sammineqarnissaanut
innersuupparput.